

Pressiteedüs 3. juuni 2018

Umal Pido hõisassiva ütenkuun tuhandõ' võrokõsõ'

Võro Kubija lauluväljaku pääl oll' 2. juunil võrokeeline laulu- ja rahvapido Uma Pido, miä tõi laulukaarõ ala kokko rekordilidsõ' 3800 lauljat. Üttekokko sai üleilmses võrokõisi kokkotulõkis nimetedü pidost ossa üten päältkaejidega inämb ku 8000 inemist.

„Olõmi õnnõligu' hengelännü pido peräst, miä näütäs võro kultuuri elojoudu. Kinä, et Kubijal oll' nii pall'o kokkohoitvat rahvast, kiä pidävä umma kodokanti tähtsäs,“ kõnõl' pido projektijuht Tigasõ Merike kõrraldajidõ nimel.

Timahavanõ Uma Pido kai tulõvikku ja lei silla vannuimmi-vannuessi põlvkunna ja noorõmbidõ põlvi vaihõl. Pido toimkund ja esinejä' olli' täüs täämbädse ao Võromaa *pavvõrit*: laulupidotulõ pand' palama kablakargaja (*slackliner*), kiä tull' laululava katussõ päält ja nuur helüluuja Ruusmaa Vootele tekk muusikat *sämpliid* pruukõn vana hobõsõrii päält.

Timahava sai täüs kümme aastakka Uma Pido traditsiooni alostusõst, tuuperäst oll' põhjust katta Võromaalõ umanõ kõrralinõ pidolaud. 18 miitret pikkä lauda ehtsevä' esinejide tuudu sadakund kuuki, karaskit ja krõnglit, midä kõik simmani aigu ütidselt maitsa saiva'.

Et tegemist oll' juubõlipidoga, usaldiva' kõrraldaja' repertuaarivaliku rahva kätte. Pido laulukava panti kokko parõmbist avaligul internetihääletusel valit võrokeelitsist koorilauluhittest.

Uma Pido lavastaja Kesoneni Helena ütõl', et timahavanõ pido oll' kirriv ja mitmõkõrralinõ nigu Võromaa vanaimä egäpäävätse' rõiva' ja tuu näüdäs' võro kultuuri nuuruslikku ku rahvalikumbat näko.

Uma Pido tandsunumbriid vidäsi Võro Gümnaasiumi rahvatandsurühm Hopser. Soovist rõhuta Eesti Vabariigi saandat sünnüpäivä kandsõva nä müüdälännü aastagasaa Võromaa mooduhitte. „Tandsja' lõiva lava pääle Võromaa maastigu hainarullõ, nuuri puiõ ja puust lattõga. Tulõ vällä, et noorõ' mõistva' rõuku tetä', selle et inämbüs omma' maalt ja maatüüd tennü ja päält tuu mõistva' nä ka kinäste võro kiilt. Olõmi uhkõ', et gümnaasiumiopilaisilõ ei olõ' Vana-Võromaa kultuur ja kodokandi kiil võõra',“ ütõl' Kesoneni Helena.

Lauljit saatsõva' Võro Muusikakooli orkestri ja ansambli Randvere Jaani juhtmisel ja solistõna astiva' üles Kalkuna Mari, Ruusmaa Vootele, Vahesaare Tauri-Viljar, folklooripunt Ütsiotsõ ja tõsõ'. Pido lõpõt' simman legendaarsõ võrokõisi ansambliga Ummamuudu.

Pidopääväle and' avalõogi Uma Pido laat, kon laubõldi uma ja hää Võromaa kraamiga. Sääl olli' esisugumadsõ' tüüarõ' ja laadulava pääl astiva' üles Verska ja Vahtsõliina muusigakuulõ pillilatsõ', Moostõ Rahvamuusigakooli opilasõ' ja pilliklubi, Võro muusigakooli lõõtsalatsõ', Rõugõ Unistuisi Kitarri Orkestri ja Nedsjä Küla Bänd.

Võrokeelist rahva- ja laulupito peetäs 2008. aastagast saani. Pido käü küläkõrda katõ Vana-Võromaa suurõmba keskusõ, Võro ja Põlva vaiht. Edimäne pido peeti Võrol Kubija lauluväljaku pääl, tñõ pido oll´ aastal 2010. Põlvan Indsikurmun, kolmas pido 2013. aastagal jäl' Võrol Kubija, neläs 2016. aastagal Põlvan ja timahva jõudsõ pido jäl' Võrolõ.

Teedüst saa mano:

Merike Tigas

Uma Pido projektijuht

Võro Selts VKKF

tel 5340 5804 merike.tigas@wi.ee

Uma Pido koduleht: www.umapido.ee

Uma Pido Facebookis: <https://www.facebook.com/umapido5>